

պահանջում գիւղացիներից. գիւղատէրը՝ Միրզա Մէհգին թելադրում է չվճարել, գիւղացիները համաձայնում են, դրա վրայ Սալար Մասուդն և Ազամը գիշերը 800 զինւած ձիաւորներով մտնում են գիւղ և ամբողջապէս հարստահարելուց յետոյ գիւղացիութեան՝ սպանում են 7 հոգու. այրում եկեղեցին, դպրոցը և 15-ից աւելի տներ. անպատուում կանանց ու աղջիկներին: Գիւղատէրը չի օգնում, գիւղացիներն էլ ինքնապաշտպանութեան միջոցներից միանգամայն զուրկ լինելով՝ չեն կարողանում աւազակներից պաշտպանել: Այսպիսով ստեղծւում է մի ողբերգական դրութիւն: Եւ բնակիչները մատնւած ծայրայեղ թշւառութեան՝ գաղթում են Նոր—Ջուղա, ուր Ս. Ամենափրկչեան վանքում մի որոշ ժամանակ ապաստան գտնելուց յետոյ, նորից գիւղ են վերագառնում:

Այնուհետև գիւղն ենթարկւում է անվերջ հարստահարութիւնների. 1917 թւին Ջարդամ, Մահմուտ և Մամթաղի (Չրադ-Սլիխանի թոռները) սիստեմատիկ կերպով հարստահարում են խեղճ գիւղացիութեան. նախ գալիս է գիւղ Մամթաղին հետևեալ պատճառով. սրա մարդկանցից մէկը գիշերով հալի արտից հունձքը գողանալիս սպանւում է, որի համար Մամթաղին 1000 թուման արիւնազին է պահանջում գիւղացիներից. նրանք մերժում են վճարել, դրա վրայ նա 200 զինւած ձիաւորներով գիշերը մտնում է գիւղ և 1000 թումանի վնաս է տալիս, ապա 1000 թուման էլ փող առնելով՝ հեռանում է գիւղից: Այնուհետև ամառը գալիս է Ջաֆար Ղուլին և բռնութեամբ առնում է գիւղացիներից 48 բեռ յարդ և եօնջա, բայց նա դրանով չի բաւականանում, ձմեռը նորից մտնում է գիւղ և առնում 20 բեռ յարդ և եօնջա ու երեք հատ էլ մատակ թողնում գիւղը, որ գիւղացիներն իրենց ծախսով պահեն: Այնուհետև գարնան 30 ձիաւորով նորից գալիս է գիւղ և հինգ օր գիւղացիների ծախսով ապրում. հեռանալիս առնում է 75 լիտր ալիւր և 75 թուման փող: